


Книгаослэн дворецсы



Визёк



Елизавета но Александра Николаеваос анаенызы
чем вуыло Йёскалык библиотекае.

Туспуктйз Максим Егоров

Эчбур, эше! Туннэ тонэ Удмуртиысь Йёскалык библиотекаен матысыгес тодматэме потэ. Мугез бадзым но пусйимон – туэ та библиотека 105 ар тырмонзэ пусье.

Йёскалык библиотека кылдйз 1918-тй арын. Отчы люкамын вал андан чыжатонья, пычал тйрлык поттонья заводьёслэн лыдзйськонниосысьтызы книгаос. Фонд арысь аре йылйз, узырмиз. Нырысетй арьёсаз ик отын утисько вал ини 25 сюрслэсь ятыр книгаос но газет-журнальёс. Библиотека өз ворсаськылы Бидзым Атыкай ож арьёсы но. Отын ужасьёс книгаосын адзйтоньёс, фронт мышкын тыршйсьёсын пумиськоньёс радьяллызы, госпитальёсын эмьяськись сёсыр ожгарчиос доры вуылйзы. Библиотека 20 ар чөже А. С. Пушкинлэсь, нош собере В.И. Ленинлэсь нимзэ нуллйз. Али но тросэз улосчиосмы сое куспазы озыы ик шуо – Ленинка. 1958-тй арын библиотека азын Владимир Ильич Ленинлэн памятникез кылдйз. Сое Удмуртия Зуч кунэ пырем дырысен 400 ар тырмонлы сйзъыса пуктйзы. Йёскалык библиотека 10 арлы тупатъян-вильдон ужьёслы ворсаськылйз. Со вакытлы книгаос Ижкарысь мукет интыосы выжтэмын вал. Вильдэм юрт осьёссэ вильысен усътйз 2021-тй арын. Реставраторьёс утизы лыдзйськоннилэсь вашкала тусбуйзэ. Будэтйзы на «Национальной библиотека Удмуртской Республики» гожтэм барельеф. Со сяна, кылдйз виль корпус. Отын одйг но жыны миллион экземпляр книгаос утисько. Пёлазы 11 сюрслэсь ятыр дуно но шер пумиськылйсь изданиос. Йёскалык библиотекае карысь но ёросьёсысь калык мыло-кыдо ветлэ. Котькуд нунал отын пöртэм пумо мастер-классьёс, экскурсиос, тодмо адямиосын пумиськоньёс, кружокьёс, адзйтоньёс ортчыло.